



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

5. Kalenderwoche – ab 29. Januar 2011

Grau musses sein!

Nee, manschma dun mir unsre Bollediggor e bißl leid! Werglisch bloß manschma! Aber dann ehm doch e bißl! Weil die manschma ihrn Kobb hinhaldn missn, fiehr Sachn, die se gahr nisch gemachd ham. Fiehr Sachn, fiehr die se eischendlich werglisch nischd dafiehr kenn!

De Vorbrauchorminisdorin, de Frau Eischnor, had doch das Diogsien ooch nisch selbor in das Fuddormiddl neingemährd! Abor von alle Seidn wird se angeschossn!

Odor das Briedorlein - dor Wirdschafdsminisdor! - dähm wird nu dor Offschwung in de Schuhe geschohm, wo dähr doch werglisch fiehr dähn Offschwung gahr nischd kann! Dähr is doch bloß Minisdor! Nee, dähn Offschwung ham ganz annre zu vorandwordn... von Schiena bis nach Dubei!

Odor ooch zum Beischbiel dor Freiherr hin un hähr zu Guddnbersch - was kann denne dähr davor, wenn off eim Schulschiff, das irschendwo im Bazefigg rumgondeln dud, de Gadeddn bledzlich meudorn dun? Ja, die meudorn dord off dähm Schiff, weilse nisch mähr hoch in de Masdn gleddorn wolln. Weil mor da runnorblumbsn kann. Un da kann isch de Gadeddn vorschdehn!

Als Kinnor haddn mir so een Schbruch - de Gadeddn hubbn in de Beddn, hubbn widdor naus un du bisd naus! Beim Freiherr Guddnbersch dun sisch nu jedzde viele winschn, dähr Schbruch däde so gehn: De Gadeddn bleim in ihre Beddn, wollen nisch mehr raus un dor Guddnbersch is naus!

Isch gloobe ganz eenfach, vieln in dor Bolledigg is dor Guddnbersch e Dorn im Ooche, weil dähr so

guhnd bei de Wähler ankomm dud. Drodz dassor adlisch is - un gegeeld is wie e marogganischer Zuhändor! Un Glamoddn had dähr immor an.. - die dun bassn!

Ja, irschendwie dud dähr bei de Leide ankomm! Ooch bei Leide, die dähn von Naduhr hähr eischendlich nisch leidn dun derfn - die eischendlich nischd mid dor CSU im Sinne ham! Meine Gudste zum Beischbiel! Ja, meine Gudste is e bißl e Fenn vom Guddnbersch!

Fiehr unsoreem als Mann is ja da in dor Bolledigg wenisch im Angebohnd - also, wo de Fenn sein kannsd! Also, wensde als Mann e normaldemberierdor Mann bisd un off Fraun schdehn dusd. Ooch von dor Frau Bauli dusde ja nischd mehr heern! Wensde als Mann in de annre Rischdung dendiern dusd... - da is das Angebohnd ganz guhd. Da kannsde schnell Fenn wern. Abor das is e annersch Dhema.

Jednfalls - vom Guddnbersch sin viele Fenn! Villeischd is das eenfach, weil, wenn dähr was sachn dud, das dann irschendwie ofd e bißl Sinn ham dud. Ooch schon, wo dähr noch nisch Grieschsminisdor gewähsn is... - ooch in dor Wirtschafd had dähr eene guhde Figuhr gemachd! Dähr wollde zum Beischbiel "Ohbl" nisch reddn! Naja, un nu sinn se alle reidisch off dähn! Dähr muss weg! Dähr vorsaud irschendwie das Gesamdbild. Wenn alle grau aussähn dun, dann dud ehm e bundor Hund werglich ziehmlich abschdeschn un das Bild grischn Schlachseide! Nee, Bollediggor derfn jede Farbe ham, bloß grau musses sein!

Eduard Sachsenmeyer